

123
Donated
by
B. N. B. B. B.
Gen. Secy
16-5-83

(46)

बालिका

जितेन्द्र उधमपुरी



जितेन्द्र उधमपुरी
जन्म (नवम्बर, १९४४)

शिक्षा : एम० ए (इतिहास), एम० ए (हिन्दी),
एम० एड; आनर्ज इन उर्दू, हिन्दी, डोगरी ।

अज्ज डोगरी भाषा गी जितेन्द्र उधमपुरी ज्नेहू
साधक दी लोड़ ऐ ।

— प्रो० रामनाथ शास्त्री

श्री जितेन्द्र उधमपुरी ने डोगरी कवता च नमैं
समां नमैं प्रयोग वरतन दा सफल प्रयास कीता ऐ ।

— दीनू भाई 'पन्त'

'जितेन्द्र' - मेरा साथी, मेरा अपना । मिगी
ओदियां रचनां पसंद न ।.. समैं दा ए चतेरा, मिगी
पूरी पूरी मेद ऐ, कण्डे दी मिट्टी-मिट्टी पीड़े च होर
बी सन्हाकड़ियें कलियें गी जन्म देग ।

— मधुकर

आदरजोग —

श्री बिजय सुमन जी ते

श्रमिता सपनमाला हुन्दी सेवा'च,

— जितेन्द्र उषमपुरी

18.8.75

कविता संग्रह

बनजारा

जितेन्द्र उधमपुरी



प्रेम प्रकाशन, जम्मू ।

BANJARA
(Dogri Poems)
Jitender Udhamपुरी

© जितेन्द्र उधमपुरी

पहला संस्करण :

दिसम्बर १९७४

०

मुल्ल : ४ रपे

०

मिलने दा पता :

डोगरी संस्था, जम्मू

डोगरा मण्डल, जम्मू

मुद्रक : एस. एन. मगोत्रा प्रिंटिंग प्रैस, जम्मू ।

इस संग्रह गी छापने आस्ते कलचरल अकादमी पासया थोई
दी माली मदाद लेई लेखक ओदा आभारी ऐ ।

०

डोगरी संस्था पासया मिले दे योगदान लेई लेखक
ओदा बी आभारी ऐ ।

पनछान

१	ए दुआर मने दा	११
२	आस	१२
३	माली	१३
४	गज भर दूरी	१४
५	मेरे गीत	१५
६	कविता	१८
७	चोर	१९
८	गजल	२१
९	भुसमुसा	२२
१०	मेरा जीवन	२३
११	वनजारा	२४
१२	इक सलाह इक मशबरा	२६
१३	ए चन्न तुन्दा	२९
१४	गजल	३२
१५	पास-बुक	३३
१६	कैदी	३४
१७	तुन्दे बाद	३५
१८	खुदमुख्तयारी	३६
१९	इक बरान लाका	३८
२०	मेला	३९
२१	ब्राह्	४१

२२	गज़ल	४२
२३	इक बहार नमीं	४३
२४	काल	४४
२५	तुस चाहो बी तां	४५
२६	में	४७
२७	हीला	४९
२८	इक दुआस संज	५१
२९	गज़ल	५२
३०	इक नां मेरा होंदा	५३
३१	इक माडर्न पेंटिंग	५६
३२	तांग	६०
३३	गज़ल	६२
३४	इक खत-इक चिट्ठी	६३
३५	निहालप	६४
३६	मन करदा ऐ	६५
३७	कल	६७



ए संग्रह



कवता खोज ते सृजन दी क्रिया ऐ । ए खोज मेरे सहावें अज्ज दे कवि दे अपने अन्दर दी खोज ऐ ते उसदे राहें जीवन दी । इन्हें दोनो गल्लें दा प्रमाण श्री जितेन्द्र उधमपुरी हुन्दा कविता संग्रह “वनजारा” ऐ ।

श्री जितेन्द्र उधमपुरी इक उच्चे दर्जे के कवि न, ते प्रौढ़ कहानीकार बी । दर-असल इक कलाकार के व्यक्तित्व की छाप उसदे चिन्तन ते सृजन दोनो पर टकोदी हुन्दी ऐ । इक आदमी के तीर पर श्री उधमपुरी गम्भीर, पैनी सूझ-बूझ ते गुज्जा अध्ययन रखने आले कलाकार न । उन्दा सभा-स्वातम जित्थें टिकेदा, ते हिरख-प्यार कर्ने भरे-रंगोए दा ऐ, उत्थें, ओ जीवन के मुल्लें, कदरें ते मानूं के मनोविज्ञानक तत्थें गी भलेयां जानदे पन्छानदे न ।

वनजारा संग्रह च इक सुर मता प्रधान ऐ । ओ ऐ पीड़ें दा सुर, दर्द दा नगमा । ते ए सुर जिन्हें भावें राहें जित्थें बी परतक्ख होए दा ऐ उसदी गूँज सवूरी मनुक्खता के दर्द की गूँज सेई हुं दी ऐ ।

अज्ज की मतीसारी कवता दा मुख्य स्वर मानूं की यातना गै । पर वनजारा संग्रह दिये सारिये कवताएं दा सुर इक ऐसे आदमी के सूखम ते सोहल भावें, कल्पनाएं, पीड़ें ते गुज्जे भेतें दा लेखा-जोखा ऐ जेड़ा इक्कला होइयै समूचे जीवन की नुषाईंदगी करदा ऐ, ते सबबनं दा प्रतिनिधि हुन्दे होई बी इक्कला-मुक्कला ऐ ।

‘मेरा जीवन’, ‘त्राह’, ‘इक बहार नमी’, ‘कैदी’, ‘पास-बुक’ ए कवतां प्रतीकात्मक कवताएं के सरोखड़ नमूने न । इन्हे च उधमपुरी

हुन्दा शिल्प ते काव्य-साधना दोवें अपने सबूरे गुणों समेत परतक्ख
होए दे न । “मेरे गीत” दियां ए पक्तियां :—

“ए मेरे भावें दे पक्खरू
समें दे फगे उप्पर
भरी इक लम्मी डुआरी
जाई पुजडन दूर दराडै
ते धर-घर जाई बंडडन
इक आस जीने दो ।”

ते “ब्राह्म” दियां ए पक्तियां :—

“बदलें दे तम्बू तनोए दे
हीखी दे किल्ले गडोए दे
होनी दी कानी त्रिक्खी ऐ
समें दी नजर पैनी ऐ ।”

श्री जितेन्द्र उधमपुरी होरें गी शायरी दे उस मुकाम पर पुजाई
दिन्दियां न, जित्थें खडोइयै कवि इक समें, इक संदर्भ ते इक जात दी
नेई, हर समें, हर जात ते हर संदर्भ दी गल्ल आखियै अपना आप
मनवाई लैन्दा ऐ ।


डोगरी कवता खेतर च ‘बनजारा’ संग्रह दा अपना टकोदा, मौलिक
ते बड़ा उच्चा स्थान ऐ । में समझनां जे डोगरी भाषा दे उच्चे
भाग न जे उसगी उधमपुरी हुन्दे जने लगन, जनून ते निस्वार्थ भाव
कन्ने लिखने आले साधक थोए न ।

ओ० पी० शर्मा ‘सारथी’

समर्पण



पूज्य पिता, पूज्या नानी
ते
बूआ जी गी ।



सदा अपनी जिन्दगी दा यरो ।

में ते ए नित्त गै भार ढोंदा रेया ॥

तेरे चेतें दी सूच्ची कली जो खिड़ी ।

हार गीतें दे सुच्चे परोंदा रेया ॥

ਪ੍ਰਿਥਮ ਪਦ ਵਿਸ਼ਾਯੀ ਵਿਸ਼ਾਯ ਪਦ
ਮੁ. ਪਦ ਵਿਸ਼ਾਯੀ ਪਦ ਵਿਸ਼ਾਯੀ ਪਦ
ਮੁ. ਵਿਸ਼ਾਯੀ ਪਦ ਵਿਸ਼ਾਯੀ ਪਦ ਵਿਸ਼ਾਯੀ ਪਦ
ਮੁ. ਪਦ ਵਿਸ਼ਾਯੀ ਪਦ ਵਿਸ਼ਾਯੀ ਪਦ

ए दुआर मने दा



तेरा चेत्ता ओँदे गे
सुरकन लगदे न
तार जिन्दड़ी दे,
आसें दियां बाह्मां
होई जंदियां न लम्मियां,
तनोई जंदी ऐ
चादर हीखियें दी,
ते भोली अक्खियां
रूप दियां लोभी
बल्लें ने जाई
खोल्ली दिन्दियां न
दुआर मने दा ।

०००

आस



हीखी दे बदल
छाए दे न,
सोचें दी बारी
खुल्ली ऐ,
भूरें दियां सीखां
मुट्टियां न ।
पर, फी बी —
इक आस नमानी
दिक्खै करदी
झांकै करदी
किन्ने चिरै दी
खबरै की ?

०००

मेरे सिर
अलजाम ऐ
जे में भाएं
कड़कदी धुप्प नई दिक्खी
बरदी बरखा नई नाची
पर
फुल्लें दे कन्ने-कन्ने
अनगिनत कंडें दा वो
जन्मदाता में आं ।

हासें दे लोभियो
छलैपें दे शकीनो
ते रूपें दे पारखियो
दनां'क न्यां करयो—
मेरे इस जुर्मा दी
मिगी भला
सजा के ऐ ?

०००

गज़ भर दूरी



सजनी,
तू ते में—
काली न्हेरी गुफा दे
इक सिरें उप्पर
आमने - सामने आं
चिर पछानू,
ते अपनी बे - बसी उप्पर
राँह् ने घूरदे - दिक्खदे
इक दूए गी,
बज्जे दे आं मरयादा दे घेरें
अजंता दे
दो बुत्तें साईं ।
जो लंघी निं सके
टप्पी निं सके
ए गज़ भर दूरी
जुगें जुगें शा . . . ।

० ० ०

मेरे गीत



मेरे गीत न
इक सदा बहार बूटा
जिदी कलम आं
अज्ज में ला करना
ते जिसगी देई
विरह दा पानी कोमल
पालै करना जवानी दे
तपदे सेकें ने ।

में जदू नई होना ऐ
इस दुनियां अन्दर
इसने तदू बी बधना ऐ
फलना-फुलना ऐ
दस्सनी ऐ रंगत अपनी
ते देने न—
पत्तर नमें
बूर नमें
ब्हारां नमियां ।

फी जेदी ठन्डिया छामां—

औने आले जुगै दे नमें मानु
राह - राहू ते
भुल्ले - भटके
अपने जीवने दी बत्ता दी
कड़कदी धुप्पा
दना 'क आई बसोडन
ते अपने दर्द - बेदन
घुटन-धुखन दौं पल इत्थें
बेई फरोलडन ।

ए गीत मेरे
हिरखी-बजोगी
चुप - चपीते
आई सरकुडन
उस जुगै दे
सुच्चे ओठे दे उप्पर ।
जा कोई
बजोगी - बजोगन
स्याले दियें लम्मियें रातीं
अपने धुखदे मनें
सिज्जे दे ननैं
खड़ोई दौं कींगरें उप्पर
कुसै कुंजू - चैंचली साईं

कोई लम्मी भाख लाङन
ते तुपङन
मीत - कैत अपने
मेरे गीते दे मेले अन्दर ;

ए मेरे भावें दे पक्खरू
समें दे फंगे उप्पर
भरी इक लम्मी डुआरी
जाई पुजङन
दूर - दराङ
ते छूई लैङन
उच्चे गासं गी,
ते मेरी तांगें दियां
रंगीन फुल - कलियां
जाड़ें - प्हाड़ें
उच्चियें - धारें
गैली - बजारें
ते घर - घर जाई बंडङन
इक आस जीने दी ॥

०००

कविता



अंधी - झकखड़
ते मारू भीड़ां
रात बी ऐ किश अत्त न्हेरी
समें दी चक्की ने
पाए दा ऐ धरमोल जन,
ते
हीले, हौंसले सब्बै
लचार न अग हीने जन
अपनी बे - बसी उप्पर,
में फी बी अपना
ए मल्लुआ जिन्दड़ी दा
ठेलै करना
धिवकै करना
पता नि किस स्हारै ?

०००

चोर



ए जीवन ऐ
हसदा - गांदा
छल - छलांदा
अपनी मरजादा दे
कंठें बज्जेया
इक दरया पवित्र
इक निर्मल गंगा,
पर, ए गंगा
निर्मल गंगा
जदूं बी तरोड़ी वन्न अपने
छोड़ी देऐ कंठें दी मरजादा
ते बगी निकलै
इक आवारा जन
तां बनी जन्दी ऐ इयै
इक तबाही
इक प्रलय ।
ते फी इयां गै
इस्से चाली,
जदूं बी जिसलै कदें

कोई मराकड़
कोई जगली
कोई आदम-खोर
आई बसदा ऐ मेरै अपने अन्दर
ते लगदा ऐ भन्नन
मेरी आस्था दिया कन्धां
मेरे विश्वासें दे घेरे
मेरे निश्चे दी ताना
तां फी अहूँ गै
उस्सं बेलै में
ए चोर मनं दा
कड़्डी औना ऐ
दूर कुतै ।

०००



फुल्लें दे हासे, नां ब्हारें दे साये,
मेरे हिस्से आये तां कडे गै आये ।

नां जांता कुसै, नां गै पड़ताल कीती,
ए प्यारा दे चरचे हे किस्से खुआये ।

बड़े दुख बृज्ज, बड़े हिरख लाये,
बो फी बी ओ साथी होई गे पराये ।

उसी पिजने दी बी के लोड़ साथी,
थोई गे जिसी रेजे कत्ते-कताये ।

।घरै बदल गासा घनी रात छाई,
नां साथी पुराने नां हिरखी गै आये ॥

०००

भुसमुसा



तेरे मिलने दी तांग
सुखने - निहालप
तृप्ति - खुशी,
ते तेरे खिडने दी
विरह - बेदन
दुख-पीड़,

इन्हें दरंगी चेतें दे
भुसमुसे च गै
बीती गया ऐ
मेरा जीवन नमाना ।

०००

मेरा जीवन



अज--

मेरे जीवने दा कनवास

नां ऐ कोई महा - काव्य

नां कोई लम्मी कहानी

नां कोई उपन्यास भारी

नां गे इक सियासी डायरी

बिजन तेरै ए बझोंदा ऐ--

समें'शा खिडे दा

वे - मतलबा

छड़ा इक लीक - बलीका . . . ।

०००

वनजारा



में वनजारा आप - मुआरा
नां में भुकेया नां में भुकना,
चलै दे रस्ते मेरे कन्ने
नां में रुकया नां में रुकना ।

चलना गै बस कम्म ऐ मेरा
बत्ता कोई बसां नई ऐ,
बत्त तपी दी लू - लू करदी
बौह्ने गित्तै छां नई ऐ ।

हिरख नमुल्ला बन्डदा फिरना
में रूपा दा इक बपारी,
जीने दा जो देन सनेड़ा
गीतें दा में अमर लखारी ।

ममता भरे पटारू बण्डां
नगर-नगर ते गैह्ली-गैह्ली,
खुशहाली दा लेई सनेड़ा
सजा ना, खेत्तर, पैली-पैली ।

चुनी - चुनी में सलदा जन्ना
कंडे बत्ता कुसै खलारे,
सैसां, भूरे, चेतै, आले
ए मेरे जीने दे सहारे ।

हर ओठै गी गीत मिलै
साकार होऐ ए मेरा सुखना,
चलै दे रस्ते मेरे कन्ने
में नईं रुकेया, में नईं रुकना ॥

में बनजारा आप - मुआरा
नां में झुकेया, नां में झुकना,
चलै दे रस्ते मेरे कन्ने
नां में रुकेया, नां में रुकना ॥

०००

“जदूँ तक लो ऐ अक्खीं च
जदूँ तक सुआस सुआसैं च ।
मेरे सज्जनैं ऐ पक्क औना
बस इयै आस आसैं च ॥”

इक सलाह इक मशबरा



मते दिनें दा ऐं
दिक्खे ना तुगी
दुआस - दुआस
ते चुप - चाप जन,
पता नि कोह् के
चेत्ते - झुरें ऐं
तूं डुब्बे दा
खवरै कोह् के न्हेर
ऐं तूं खुब्बे दा,
तूं हार नईं हिम्मत
तूं छोड़ नईं हौंसला
रात होऐ भांए
किन्नी गै लम्मी
ते किन्नी न्हेरी
फो बी आखर
होना ऐ ऐंत एदा
ते गासै गी बेधियै
दिक्खना ऐ
सूरजै दी चिट्ठी लोई ने ।

ते ए—

न्हेरा - लो

दुख - सुख

फुल - कडे

बस इयै न अंग जीवन दे

इयै तत्त - सार जीवन दे

मड़ो, इक्कै नेह्, दिन बी इत्थें

भला कुसै दे राँह् दे न ।

पर, फी बी

मेरे साथी, मेरे दोस्त !

इक सलाह्, ऐ

इक मशबरा

जे, मेरा ए जीवन

तां गै सफल ऐ

जे में तेरै

किसै कम्म आई जां,

की जे

इस संसारै अन्दर

हर मानु गी ऐ मानु कन्ने

इक सांझ

इक हिरख

इक नाता

सुच्चा दर्द दा नाता
 ते जेदे उप्पर ऐ
 खड़ोती दी
 ए कन्घ मनुखता दी,
 आ, में लेई लैं
 तेरे दर्द सारे
 ते लैं बन्नी
 तेरे दुखें दा बुशका
 चुनी लैं इक - इक करी
 में सब्बे कंडे
 तेरी जीवन क्यारी दा
 ते टंगी देयां
 तेरी हर पतझड़ी टाह्ली उप्पर
 कलियें दा इक सुच्चा हासा ।

०००

ए चन्न तुन्दा



ओ दूर बदलें दे ओह्लै
सोह्ना-सुन्दर अत्त गै बांका
रूप ऐ जेदा छैल सुन्हाका
पीला - पीला ओ इक चन्द्रमां ।
सीतल ठन्डी लोई दा ऐ
जिसगी बरदान थोए दा
ते बनी जन्दा ऐ जेड़ा उपमा
गोरी दे साकार
मान छलैपे दी
जां फी ऐ जेड़ा
सुन्ने दा गै इक बाला
नीले अम्बर टंगे दा ।

ब' अज्जे दे इस
साईं सी जुगै अन्दर
ओ नईं बांका
ओ नईं सुन्दर
अत्त भ्यंकर
अत्त गै बंजर

जेदा पिजर

मिट्टी - पत्थर

रेत - जन्धर

ते उब्ब - खड्डुब्बे

प्हाड़ - टिब्बे

बगानी लोई दे स्हारें

जेड़ा घटदा बधदा

चलदा - फिरदा

छड़ा इक परछामां,

घरती शा उप्पर

इक पड़ां

मंजल दा पह्ला मोड़

दना भर बसोने गी,

कीजे अज्जै दे मानु दी

मंजल ऐ, चन्ने शा बी

दूर गै अगों ।

पर मेरी इस

भुक्खी बस्ती लेई

जेदे बसनीक न

इस्से घरती दे मानु

जेढे कल बी कड़कदी धुप्पा

ते अजब बो सङ्गदी लूआ
 तिङ्ककदे पिन्डे
 जलदे हस्थे
 रेह् बछांदि
 रोङ्गे - पत्थर
 काली लुकक
 लम्मी कच्छी सिङ्कका दी छातो उप्पर ।
 उन्दे लेई
 ए चग्न नई
 ए ते ऐ छड़ा
 इक मनके दा होडा
 पीला-पीला
 गोल-गोल
 उन्दी हुम्मे वा दूर कुले
 नीली अम्बर टगे दा ॥

० ०

जेदा पिंजर

मिट्टी - पत्थर

रेत - जन्खर

ते उब्ब - खडुब्बे

पहाड़ - टिब्बे

बगानी लोई दे सहारै

जेढ़ा घटदा बधदा

चलदा - फिरदा

छड़ा इक परछामां,

धरती शा उप्पर

इक पड़ां

मंजल दा पह्ला मोड़

दना भर बसोने गी,

कीजे अज्जै दे मानु दी

मंजल ऐ, चन्ने शा बी

दूर गी अगगें ।

पर मेरी इस

भुक्खी बस्ती लेई

जेदे बसनीक न

इस्सै धरती दे मानु

जेढ़े कल बी कड़कदी धुप्पा

ते अज्ज बी सड़दी लूआ
 तिड़कदे पिन्डे
 जलदे हत्थे
 रेह् बछांदे
 रोड़े - पत्थर
 काली लुकक
 लम्मी कच्ची सिड़का दी छाती उप्पर ।
 उन्दे लेई
 ए चन्न नईं
 ए ते ऐ छड़ा
 इक मक्के दा ढोडा
 पीला-पीला
 गोल-गोल
 उन्दी ह्,म्बे शा दूर कुते
 नीलै अम्बर टगे दा ॥

० ०



कैसी अजीब ए दुनिया ऐ कैसे अजीब लोक,
मन दे छिन्डे रेह् बने उयां करीब लोक ।

औखी ही, जां ओ सैह्ल ही, ओ ते निभी गेई ।
कैसा हा ओ समां, हे किन्ने खुशनसीब लोक ।

तने 'प टल्ला ते नईं जीने दा बी संदोख,
देसै मेरे दे अज्ज बी किन्ने गरीब लोक ।

सुखें दे साथी सब जरो, दुखें च इक्कले,
चलदे न आपूं अपनी चुक्की सलीब लोक ।

उन्दे बिजन ते पुज्जना हा मंजला 'प म्हाल,
स्थाड़ै ते बनी गे जरो साढ़े नसीब लोक ॥

०००



दिक्खी सुनी
चंगी चाली
जाची परखी
जोड़ करी
स्थाव मेली
बनझाई लैता ऐ में
अपनी उमरा दे इस
बैलैस शीटा गी ।
जित्थे बचे दे न अज्ज
छड़े किश
बुड्ढे चेते आप - मुहारे
ते किश गल्लां
होइयां बीतियां
भज्जी - ढठी दी मढ़िये साई ।
मेरे जीवने दी
इस पास - बुकै दा
स्थाव बी किन्ता
टकोदा ऐ ।

०००



हिरखै दा समुन्दर लम्मा ऐ
 ते मनं दा टापू लौह्का
 आसैं दे जाले घने न
 ते भूरें दा धुआं काला
 दम घुटदा ऐ ।
 चेतें दियां संगलां भारियां न
 ते दुआसी दियां सीखां मुट्टियां
 त्रुटदियां नईं
 चकोंदियां नईं
 सटोंदियां नईं
 छाल्ले पेई गे न ।
 खबरें मिमी आं कोई
 काले पानी दा कैद्दी ।

०००

तुन्दे बाद



तुन्दे मगरा
ए मन मेरा
अत्त गै बैतल
अत्त बतूरा
चुप्प - चपीता
भुल्ला - भुल्ला
भड़कदा रौह्दा
चौनें कूटे
गैह्लीं - बजारें
ते तुपदा रौह्दा
किश गुआचे दा ।
ते फी खीर—
हारी - हुट्टी
चुनदा रौह्दा
कत्तल - कत्तल
तुन्दे चेते दी,
फींगर-फींगर
तुन्दे विश्वासें दी . . . ।

०००

खुदमुख्तारी



जदूँ बी कदें-कदें
निं दिन्दी
दना बी ध्यान
सरकार मेरी नगरी दी
जनता दी बहूँ दी उप्पर ।
ते जुआन हीखियां
तांगां ते मेदां
लगदियां न कलमान
उन्दी बेरुखी उप्पर ।
ते उन्दे जुल्में दी शकार
ए बेबस मनं दी बस्ती
त्रयाई दी
तरसी पौंदी ऐ
प्यारं दी फुंगै - फुंगै लेई,
फाकें - फाकें
होई नढाल लगदी ऐ
दम तरोड़न ।
पत्तर हिरखें - रीझें दे
लगदे न झड़न

बरदी बरसांती ब्हारा
 ते एमनी, वादे, नारे
 होई लोप सब्बै
 मची जन्दी ऐ
 इक भगदड
 इक धान्दली
 मेरी आसैं दी हर नुक्करा ।
 भुक्खमरी, दुक्ख, लचारी
 सैंसां, भूरे ते दुआसी
 बे-रुखी, बे-बसी ते तंगदस्ती
 बनी प्रेत सब्बै
 लगदे न फिरन
 मेरे मनैं दी गली-गली,
 तां अक्सर 'उस बेलें
 मनैं च औंदा ऐ मेरै
 जे उतरी आमां अज्ज
 मिमी बगावत उप्पर
 ते करी देयां एलान
 अपनी खुद-मुखत्यारी दा ।

०००

इक बरान लाका



मेरे मनै दी
इस वस्ती अन्दर
दूर दूर तिकर
ऐ छाई दी
इक घनी दूआसी,
घिरी आई दी ऐ
घोर चुप्पी,
चेतें दे तम्बू
मकान ते मानु
छड़े न चुप - चपीते
टिके दे परछीरे
वे जान कुप्पड़ - पत्थर ।
जिंदगी दा ए लाका अजकल
किश मता गै
बरान लबदा ऐ ।

०००



ए आसैं दे मेले, ए रीतें दे मेले
सुन्हाकी, बड़ी सोह्ल प्रीतें दे मेले,
समें दे कुतै सोह्ल ओठें दे उप्पर
ए हिरखी, बजोगी, ए गीतें दे मेले ।

मने दी ए रीझें ते आसैं दे मेले
ए नैन दे मेले, ए प्राणें दे मेले,
ए जिंदगी दे सुरें - तालें उप्पर
ए भाखें दे मेले, ए तानें दे मेले ।

भीरें दे मेले, गरीबें दे मेले
ए दूरें दे मेले, करीबें दे मेले,
जीवन दी अनजानियें बत्तें उप्पर
ए सारें दे सांभे नसीब दे मेले ।

ए हिरखें दे मेले, सुआसैं दे मेले
बड़े रगले ए दनास दे मेने,
ए खुशियें दे मेले, हासैं दे मेले
ए खेडें दे मेले, तमासैं दे मेले ।

जीवन दी फी न्हेरियें संजें अन्दर
ए मेले, ए रोनक कुतें बी निं रौह्ने,
ए रूपें दे गाह्की, छलपें दे जानू
कोई बी निं ए काल्ले अगें खड़ोने ।

ए दुनियां बी ते इक मेला ऐ यारो
छड़ी मोह् ते ममता, माया दी नगरी
औना घड़ी भर बसोना ते चलना
ए बक्से तेरे सब्ब किश सबाब सफरी ।

ए आसें दे मेले, ए रीतें दे मेले
सुन्हाकी, बड़ी सोह्ल प्रीतें दे मेले,
समें दे कुतें सोह्ल ओठें दे उप्पर
ए हिरखी, बजोगी ए गीतें दे मेले ॥

०००

त्राह्



बदलें दे तम्बू तनोए दे
हीखी दे किल्ले गडोए दे
होनी दी कानी त्रिक्खी ऐ
समें दी नज़र पैन्नी ऐ
मलाह् गी आक्खो—
मछुआ नईं खोलें
तुफान ते गेदा ऐ
भाएं थमोई
ब' त्राह् . . .
अजें बी वाकी ऐ ।

०००

गज़ल



जदूँ तक दोस्तो इस जिन्दगी बिच साहू, बी बाकी ऐ,
ने राहू, जीने दे बाकी पीने दी ए चाहू, बी बाकी ऐ ।

असें ए मन्नेया जे घा अजें छाती दे अल्ले न,
अजें ते सकत बाकी ऐ, अजें ते साहू, बी बाकी ऐ ।

पटोने नि कदम अगें ए मज़ल दूर गै रौहूनी,
जदूँ तक शक़ड़ें दा बिन्द सारा त्राहू, बी बाकी ऐ ।

भाएँ कोई मंज़ला दा चिन्न जां साथी बी नईं लब्बै,
चली चल तू जदूँ तक साहेँ दे बिच साहू, बी बाकी ऐ ।

ए केहूँ ड़ा थार ऐ साथी मेरे जीवन दी बत्ता दा,
कोई बी दर्द नि बाकी नां कोई आहू, बी बाकी ऐ ।

०००

इक बहार नमीं



अज —

वत्त भाएं न्हेरी ऐ
ते समें दे पेर पुट्ठे,
वे - रह्म बदल न
मेरी आसैं दी
बस्ती उप्पर,
दुआसी दे भक्खड़ न
भुल्लै दे चक्खे,
ब' तुसैं गी
मेरे हीले - सुखनैं पर
भला खिझ की ऐ . . . ?
अत्त कुंगले न भाएं
लौह् के न औंकर
इस खेतरैं दे
ब' इनें गे कल
मठोइये देनी ऐ
इक नमीं बहार जुगं गी ।

०००



कुतै चुप - चपीता
 कुतै बनी भूंचल
 कुतै महांमारी
 कुतै जगी बददल
 ते फो इस्सै चाली
 ए काल बहुरूपी
 बदली - बदलियै
 केई रूप अपने
 फिरै करदा ऐ घर-घर
 लंघै करदा ऐ गली-गली
 निगलै करदा ऐ . . .
 हिरख - छलेपे ते जोवन
 मरोड़ं करदा ऐ
 जीन्दे अंग-अंग
 ते नचोड़ै करदा ऐ
 लऊ सुच्चा
 मेरे इस बीतदे जुगे दा ।

०००

तुस चाहो बी तां....



दुनियां दी
इस मंडी अन्दर
हर चीजा दा ऐ मुल्ल अपना
मान-छलेपा अपना ।
डै-डै करदी
चिट्ठी चाननी
अत्त गै सुन्दर
अत्त सुहानी
भरी दिन्दी ऐ गोदां भाए
हिरखै दे
सोहने - सुच्चे फुल्ले ने ।

पर, इस सां - सां करदी
काली राती दा बी ते ऐ
मुल्ल कोई
थार कोई ।
की जे, एदे पिच्छे गै ऐ
मान स्वातम इस चाननी दा ।
इन्दा ऐ नाता गूढ़ा

प्रीत ऐ गूढ़ी
संजोग गूढ़ें ।

इस्से चाली
मेरी सजनी
मिमि आं इक बंदा-गैह्ना
त्रुट्टा - भज्जा
अत्त पराना
तुन्दी बाहीं उप्पर गै नईं छड़ा
तुन्दे मने अन्दर बी डगना ए
पर, फी बी आं सुन्ने दा
तुस चाहो बी तां . . .
तुआरिये सुट्टी नईं सकदे ।

०००

मिमो आं अज इत्थें
 इक कोई बुढ़ा रुख छड़ा
 खड़ोते दा ऐ जेढ़ा
 कुतै दूर - दराडै
 न्हेरी वत्तें दे
 इक चरस्ते उप्पर
 दुखर गलां दे न लोक जिसगी ।

जवानी दियां सब्बे बरासतां
 राँसा-ब्हारां
 पुम्बलियां - पत्तर
 हून सुखने न होये-बीते दे ।
 इक्कै-इक बस कल्ल-मकुल्ला
 समें दे काकले शा पिछड़े दा
 प्रेत आं खबरें कोई
 कुसं प्रेत नगरी दा ।

ए हुसन, जोर-छुआनी
 ते हीखियां सब्बे
 रेई गे न कुतै दूर गे पिच्छें

खिण्डी मे न पत्तरे साईं
जीवन दी इक पत्तझड़ी सजा
ते नईं परतोए कदे बी
दना 'क मेरा हाल पुच्छते गो ।

छड़ा इक पैछिये दा जोड़ा
किश अनमना जन
ते सहमयां-सहमयां
ऐ अजे बी बेठे दा
मेरी उपरली टाह्ली दे इक नुरगन
ते
जिसी अज में
रातीं दे अध-मझाटै
फुसर-फुसर करदे सुनेया ऐ
जे कल असें
जाई बस्सना ऐ
कुतै ठण्डिया छामां ।

०००



जदूं बी में
 चलदा-चलदा
 हारी - हुट्टी जन्ना ऐ
 इस जीवने दी
 लम्मी बत्ता उप्पर ।
 कोशशां, जतन
 ते निश्चे सब्बै
 होई जन्दे न नाबर ।
 में ठेरी ढाइयं
 निम्मोझाना होई
 लगना ऐ दना'क बसोन
 कुसै अनजान नुकरा ।
 तां फी उस्सै लै कोई आई
 भुनकी जन्दा ऐ मिगी
 जे ए नईं ऐ
 तेरे बौह् ने दा बेल्ला
 तेरे बसोने दा बेल्ला
 चलना गै जीवन ऐ

ते रुकना नां मौती दा
 तूं दुआस नईं हो
 ते छुड़ नईं हौंसला
 ओ दिक्ख हां
 सामनै तेरै
 कदूं दी मन्जल खड़ोती
 तुई ऐ हाम्बे दी ।
 हून ते लोड़ ऐ मड़ेया
 छड़ी इक गै हीले दी ।

०००

इक दुआस संज



समें दा ए इक पेहिया
कदे रुकेया नि दना भर
चलै करदा ऐ नित्त गै
ए चाल अपनी . . . ।
दिन, बार, साल, म्हीने
बने दे न छड़े इक गुलाम जन
ते घसटोऐ करदे न एदे कन्ने-कन्ने,
ए रुत्तां ब्हारां मौसम सब्बै
परतै करदे न
पासे अपने-अपने . . .
पर, फी बी इक सज
उयै दुआस संज
जदूँ अस दोऐ खिडे हे
अजै बी खड़ोती दी ऐ
मेरी छज्जी दे थल्लै
बड़ी ऐ निम्मोज्ञानी ते
अत्त गै दुआस-दुआस
कुसै भटके दे मुसाफरा साईं
मेरे चेतें दी सौंगड़ी गैहला।

० ० ०



तुसें गै ते पैहल कीती, मुंह् बी फी मोड़ी गे,
तुन्दे पिच्छें चेत साढ़े दूरै - दूरै तोड़ी गे ।

चलो तुस तुन्दे कन्ने मंजलां बी चलदियां न,
अस चले रस्ते बी साथ साढ़ा छोड़ी गे ।

बाग भांए सांझे न नसीब बक्खो - बक्ख न,
कुसै फुल्ल खुन्दे, कुसै कंडे गै तरोड़ी ले ।

उद्धमी हे बड़ें जेढ़ें मजला 'प पुज्जी गे,
दुएं गितै परें दे नशान म्हेसां छोड़ी गे ।

चरचे जुदाइयें आले दूरै तोड़ी पुज्जी गे,
साढ़ा ते कसूर नईं ऐ, तुस्सै साथ छोड़ी गे ॥

० ० ०

इक नां मेरा होंदा



में कवि आं
ते अज्ज कुते
दूर-दराड
कुसँ इक नुक्करा च
घटोए - घटोए दा
संगोए - संगोए दा
(ढाका 'फाल' होने शा किश गै चिर पैहलें)
सोचँ करना, जे
मिमि कदें कोई
सपाही होंदा
मुक्ति फौजा दा
तां मेरे हत्थें अज्ज
ए कान्नी नईं
इक स्टेनगन होंदी
ते कुसँ मोर्चे उपपर

बैठे-बंठे दा
लग्गी दी निशिस्ते चा
निकली दी गोली
लंघी जन्दी
बेघी जन्दी
उस बे - दर्द छाती गो
जित्थें कोई दिल नईं
पत्थर ऐ आई बस्से दा ।

ते जां फी हुन्दा में
कोई चालक
कुसै तेज ज्हाजा दा
कुसै भारे टैंका दा
ते तड़ो-ताड़ बराही दिन्दा
बरखा फी गोलें दी
ते लंघी जन्दा
दलदा-मलदा
कुसै मस्त हाथियें साईं
पापी मानुयें दे
काले - मेले पिंजर ।

ते एँत लड़दा - लड़दा
अपनी इस जिदड़ी गो

बारी दिदा
अपने इस देसै उप्पर
जे अजादी दी अमर कहानी च
दो अक्खर मेरे होई जदे
लाऊआ दे सूऐ
समुन्दरा च
चार तोपे मेरे होई जंदे
ते मरने आलें दी चन्दी च
इक नां मेरा होंदा ।

० ० ०

इक माडर्न पेंटिंग



ओ दिक्खो हां
दना 'क पिछलै पासै
उस कन्धा दी इक बक्खी
बनकी दी सोह्नी-सुन्दर चित्रछाया
खिच्चै करदी अपने पासै,
भावें दी इस मंडी अन्दर
इक चीज नमीं ऐ इस जुगै दी ।
रंगें दी ए माया नगरी
किछ थोब्बे . . .
किश लीकां . . .
किश पोचे . . . ।

ए के इक चौतड़ा जन
जां उब्ब-खडुब्बा कोई टिब्बा
जेदे उप्पर बैठे दा चरवाल कोई

अपनी लम्मी भाखें राहें
सददै करदा चिरै दी खिण्डी अपनी गद्दन ।

नई, नई
ए ते ऐ कोई सूहा-पीला
किश तम्बू जन तनोए दा
तांगें दे धागें बज्जे दा
रंगोए दा चितरोए दा
ए कुतै डोली ते नई
छैल-सुन्हाकी गोरी दी
व्हारें दे मूडें उप्पर ।

ते किश ए चिट्टे थोवे जन
बभोंदी ऐ इक टोली मिक्की
जागत-पूगत न्यानें दी
जेढी ऐ हस्सै करदी
झांकै करदी
जुगै दे शीशे अन्दर
ते बलगै करदी किन्ने चिरै दी
औने आली ब्हारें गी ।

ए काले-काले भौंगर जन

लब्ध करदे मानु नई
 उन्दें गै परछामें
 जेढ़ न बेजान मड़
 हाम्बै करदे दूर कुतै
 सुन्न-मसुन्ने गासै गी ।

पर, ए के ऐ, इक लीकर जन
 बिचो-बिच दूरै तिक्कर
 पूरे गै कनबासै उप्पर
 ते आस-पासै किश ए बाह्मा
 हाम्बै करदियां इक दुऐ गी ।
 लीकर नई
 ए ते ऐ
 दरेड़ मनै दी
 इक सरहद
 इक बरना
 इक रोक समें दी
 जेढ़ी मिलन निं दिन्दी
 मानु गी मानु ते ।

ते किश ए पोचे जेढ़े
 बलै दे न भाम्बड़ जन
 उट्टै दे अगगी दे लोरे

लब्बै करदे 'वितनाम' दी जंग
ते दूरै तक्कर उडदी कालख
लिम्बै करदी
मुंह मनुक्खता दा ।

छोड़ मना ए रगड़-झगड़
ए नईं मेरी समझा दो गल्ल
ए ते न भाव मन दे
डींगे-त्रेडे
गुंजल-खौदल
जेढ़े न भटकै करदे आप मुहारे
मेरै साईं ।

०००

तांग



मनै दे अन्दर खौदल की ऐ
चेतें दी परचोल बी की ऐ,
तुन्दी इस हिरखै दी नगरी
यारो ए घमचोल बी की ऐ ।

गे कुतां गी सुच्चे हासे
किसी गुआचे सोह्ल गड़ाके,
इनै सन्हाके मुखड़ें उप्पर
की न्हेरें दे काले बासे ।

भुक्ख, लचारी नैनै छाई
किसी होआ बे - हाल,
गीत गुआचे, ओठ प्यासे
होया मंदड़ा - हाल ।

सोझ गुआची, हासे रुस्से
आस फिरी बी जीने दी,
अत्त पराना फट्टा चोला
ममता फिरी बी सीने दी ।

में त्हेरें दी छाती चीरी
लेई मसैरा टुरना ऐ,
लचार इने में जीवें गो
इक देइयै सहारा टुरना ऐ ।

में सारै चानन बण्डने न
पतझड़ें गी पत्तर देने न,
आसें दी बंजर धरती गी
किश औंकर-वत्तर देने न ।

०००



मते दुख जरे ते, मते जँहूर पीते,
तुसें बी ते के के नईं जुल्म कीते ।

कदेँ ताह्ने-मीह्ने, कदेँ रमजां-बट्टे,
असें बी नमें रोज लंगार सीते ।

नजर ही न्यानी टिकी तुन्दे उप्पर,
तुसें हसदे-हसदे बी दागे पलीते ।

कुसै गी पता के बिजन तुन्दे साथी,
कियां उमर लंघी कियां साल बीते ।

घुले बी जले बी बो ओ कित्त लेक्खं,
उमर ही लम्मी ते निक्के हे फीते ॥

० ० ०

इक खत-इक चिट्ठी



मनै दे इस
टाईप राईटरें उप्पर
चढ़ाई भावें दा
में कोरा काकल
छपदा गी रौह्ना अक्सर
नेरे चेतें दे रंगीन अक्खर ।
ते फी
बंद करी समें दे
बरंग लफाफे अन्दर
तेरी बजोगी बारी दे
खींगरे भित्तें च
सुट्टी औन्नां ऐ चुप-चपीता
पता नि अजें तिवकर
किन्ने 'ग खत्त-पत्तर
तुगी थोए न ?

०००

निहालप



में कदूँ दा
अदरले भित्त गुहाड़ी
देया करना ऐ
खडुत पैहूँ रा,
कदूँ औग . . .
कदूँ औग कोई
सनोचेया अजें तक नेईं
कोई छेड़-छड़का,
नां गै लब्भा
पैरें दा नशान कोई
छड़ा, टंगोये दा ऐ
पछौंकरा जन
इक भलाखा, जेहड़ा
घड़ी दे पैंडुलम साईं
हिल्ला दा ऐ वरोबर ।

०००

मन करदा ऐ

२

जदूँ कदें
जित्थें बी कुत
नजर जाई खड़ोंदी ऐ
कुसैं तत्ती - जलदी, बलदी
काली शिड़का दे उप्पर
लगगे दे
सुलबुल-सुलबुल करदे
तिड़कदे पिण्डें
सरकदे शरीरे
हुट्टें-त्रुट्टे दे
ब' फी बी, कम्म च रुज्जे दे
नंग-मनुंगे मानुयें उप्पर
तां मेरी दुआस अक्खिये अगों
आई खड़ोंदे न चुप-चाप
किश गिल्लुयें दे हाम्बदे चेहरे

देसै दा भविक्ख
तां उस्सै लै मने च
औंदा ऐ मेरे
जे में फींगर-फींगर करी देयां
इस माजवादी शीशे गी ।

०००

“असें ए मन्नेया पैण्डे न औक्खे दूर ऐ मंजल
ब'फी वी पुज्जना ऐ ढलदिया सजा शा किश प्हेलें ।”


००


कल



जिन्दगी दी सुनसान बत्ता
ए जीवन मेरा
कल-मकुल्ला
चुप-चपीता
दुआस - दुआस
छड़ा इक निर्जीव परछायां
कुसे बनदी-म्हिसदी लीकरा साईं
टंगोचे दा ऐ भाए
किश गै साहें उप्पर
ब' बलगै करदा ऐ
किन्ने चिरै दा
इक औने आले कल्लै गी
जड़ा पक्क औना ऐ ।

० ० ०





कवि ने मती कौड़तन चक्खी दी ऐ, मतियां
तलवियां जरियां न। उन्दा गै रूप इनें कवताए
च उब्भरदा ऐ।

—विश्वानाथ खजूरिया

में 'वनजारा' कविता संग्रह दियां सब्बै कवितां
पढ़ियां न। ए बितौ च भाए लौहू कियां न, पर
गूढ़भाव भरोचियां गुथलियां न। डौगरी काव्य
क्षेत्र च इन्दी काव्य शैली अपना विशिष्ट स्थान
रखदी ऐ।

—डा० चम्पा शर्मा

'वनजारा' संग्रह में अनुभूति, उच्च कल्पना,
सृजन-प्रक्रिया, प्रवाहपूर्ण भाषा और भावों की
ताजगी देखकर मैं गद्गद हो गया।

—डा० हरदेव बाहरी

संगृहीत कविताओं में रचनाकार की दृष्टि एक
निःस्पृह एवं तटस्थ चिन्तक की दृष्टि है। इस
नवोदित कलाकार में इतना सामर्थ्य है, प्रतिभा है
यह जानकर परम हर्ष हुआ।

—डा० संसार चंद्र

